

## HUGHES, EDWARD (1856 - 1925), ysgrifennydd cyffredinol a chynrychiolydd y 'North Wales Miners Association'

**Enw:** Edward Hughes

**Dyddiad geni:** 1856

**Dyddiad marw:** 1925

**Priod:** Elisabeth Hughes (née Hughes)

**Plentyn:** Hugh Hughes

**Rhiant:** Maria Hughes

**Rhiant:** Hugh Hughes

**Rhyw:** Gwryw

**Galwedigaeth:** ysgrifennydd cyffredinol a chynrychiolydd y 'North Wales Miners Association'

**Maes gweithgaredd:** Diwydiant a Busnes; Gwleidyddiaeth a Mudiadau Gwleidyddol

**Awdur:** George Geoffrey Lerry

Ganwyd 22 Mawrth 1856 yn Trelogan, Sir y Fflint, mab Hugh a Maria Hughes, Ffordd Faen, Trelogan. Gweithiwr ar ffermydd oedd y tad. Yn ei atgofion (sydd heb eu cyhoeddi) dywed Edward Hughes iddo gael yr hyn nas cafodd ei frodyr, sef mynd am dair blynedd i ysgol ym mhentre Trelogan, a sefydlasid trwy ymdrechion blaenor gyda'r Methodistiaid Calфинаidd a oedd yn farsiantwr yn Lerpwl. Yn 1863, yn saith oed, dechreuodd weithio yng nghwaith mwyn Trelogan; yn 12 oed aeth i lofa Mostyn Quay ('Hen Waith'); ac yn ddiweddarach bu'n gweithio yng nglofa Hanmer, Mostyn. Pan oedd yn 19 oed cerddodd i Lerpwl i gael trêen i lofa Durham a bu'n gweithio yng nglofa Easington. Priododd yno, yn 1877, Elisabeth, merch William a Sarah Hughes, Lloc, plwyf Whitford; bu iddynt fab (Hugh) a dwy ferch. Bu streic am 11 wythnos yn Easington, a chymerodd Hughes ran flaenllaw ynddi fel arweinydd y glowyr. Dychwelodd i Trelogan yn 1887 a bu'n gweithio fel glowr yng nglofa Point of Ayr; yno hefyd bu'n arwain y glowyr mewn streic dair-wythnos. Pan ddaeth y streic i ben fe'i dewiswyd yn 'checkweigher' - y cyntaf i ddal y swydd honno. Dewiswyd ef yn ysgrifennydd ariannol y 'Denbighshire and Flintshire Miners Association' yn 1891; daeth yn ysgrifennydd cyffredinol y 'North Wales Miners Association' yn 1897, ac, yn 1898, yn gynrychiolydd parhaol ac ysgrifennydd yr undeb hwnnw. Symudodd yn 1899 i Wrecsam, lle yr adeiladwyd penswyddfa i'r undeb yn Bradley Road yn 1902. Yn ystod y 27 mlynedd y bu Hughes yn ysgrifennydd yr undeb cododd rhif yr aelodau o 2,732 i 15,229. Etholwyd ef ar bwyllgor gwaith y 'Miners Federation of Great Britain.' Yr oedd yn arweinydd doeth ac fe'i perchid gan y meistri hefyd. Dewiswyd ef yn aelod o gyngor sir Ddinbych yn 1901, a bu'n aldramon o 1907 hyd 1918. Bu farw 10 Mawrth 1925 yn Wrecsam.

### Awdur

George Geoffrey Lerry

### Ffynonellau

*Wrexham Advertiser* a *The Wrexham Leader*, 13 Mawrth 1925

*Reports of the North Wales Miners Association* (1925), 1925

G. G. Lerry, *The Collieries of Denbighshire-past and present, etc* (Wrexham Oswestry 1946)

### Dolenni Ychwanegol

Wikidata: [Q20732945](https://www.wikidata.org/wiki/Q20732945)

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.